

Am ganze Leib gezittert

In manchi Banater Ortschaften gits an der Kerwei de Vor- un Nohtänzer mit ihre Vor- un Nohtänzerinne. Sie sin die erschte zwaa Phaare beim Ufmarsch un han so manch anri Verpflichtunge. Des is meischt in de Heckederfer so gewenn. Uf der Heed ware die erschte zwaa Phaare die Geldherre mit ihre Geldfraue. Un erscht nohdem de Rosmareinstrauß verletzetiert gin is, war es Vortänzerphaar, also die Straußgewinner, bstimmt.

Ob jetz Vortänzer oder Geldherr – sie han bei eener Kerwei die meischte un greeschte Sorche ghat, dass jo alles klappt. Sie han sich schun Wuche vorher um die Musich kimmre misse, es sin Lischte gemacht gin, welli Leit als Ehrengäscht ingelad were. Mer hat sorche misse, dass jo genuch Wein vorrätich war. Un Geld hat ach gsammelt gin misse, weil weder Musich noch Wein un Sodawasser hats umesunscht gin. In villi Derfer sin die Kerweibuwe mit Quitte inlade gang. Jedi Quitt hat e Rosmareinstreissl mit Band ghat.

Un nit akar wer hat Vortänzer oder Geldherr sin kenne oder wille. Es greescht Problem for die Buwe, des war immer de Kerweispruch, de mer jo ufm Fass am Kerweisunntach vor alli Leit saan hat misse. Un so e Spruch hat mer ausewenzich lerne selle. Un nit jeder hat Kurasch, sich ufs Fass zu stelle un e Gedicht ufsaan. Drum han sich die Kerweibuwe meischt im Krees newerm Fass ufgstellt, dass se pischpre, also insaan kenne, wann de Vortänzer steche bleibt. Un sowieso war noh jeder Stroph entweder de Ausruf: „Zur Musich mol“, „Zum trink mer mol“ oder „Zum tanz mer mol“. Bei letschterem Ausruf han die Musikante es Kerweistickl gspillt un die Phaare han sich inghong un sin ums Fass rum getanzt. In dere Zeit hat de Vortänzer Zeit ghat sich zu fasse, nohzudenke oder gar schnell uf e zammgekrumbelte Zetl schaue, de wu er in der Handfläch gedrickt ghal hat.

So war mol frieher in eener Banater Ortschaft de Sohn vum reichschte Bauer de Vortänzer. Er war e hibscher Bu un hat ach e scheeni Vortänzerin ghat. Doch schun in der Schul war de Matzi immer stark ufgeregt, wann er an die Tafel hat misse for antworte un hat nie vill rausgebrung, grad wann er sei Lektion gelernt ghat un alles gewisst hat. Sei Familei un alli Kumrade han em gut zugered, er werd bei der Kerwei schun alles richtich mache. Doch de Matzi hat am ganze Leib gezittert, nor wann er ans Fass un de Spruch gedenkt hat. Wie er dann am Kerweisunntach uf dem Fass mitm Rosmarein in der Hand gstann hat, war de Spruch wie weg geblost. Er hat noh jedem zweite Wort „Zur Musich mol“ geruft un die Musikante han jedsmol anfang „Trararara“ zu geije. An seller Kerwei war meh Musich zu heere, de Spuch hat sich ganz verlör. For die Bauerschfamilie war des e Schand un am Matz is de Spottname „Trararara“-Vortänzer hafte geblieb.